

## ՀՈՐԵԼՅԱՆՆԵՐ JUBILEE

---



### ՀԱՅ ԹԱՏԵՐԱԳԻՏՈՒԹՅԱՆ ՊԱՏՐԻԱՐՔԸ

(Հենրիկ Հովհաննիսյանի ծննդյան  
85-ամյակի առթիվ)

Լրացավ ՀՀ ԳԱԱ արվեստի ինստիտուտի թատրոնի բաժնի վարիչ, ՀՀ ԳԱԱ թղթակից անդամ, ՀՀ գիտության վաստակավոր գործիչ, արվեստագիտության դոկտոր, պրոֆեսոր Հենրիկ Վահանի Հով-

հաննիսյանի ծննդյան 85 և գիտական գործունեության 60-ամյակը<sup>1</sup>:

Հ. Հովհաննիսյանը ծնվել է 1936 թ. հունիսի 3-ին, Լենինական քաղաքում: 1954 թ. ավարտել է Երևանի Ա.Գրիբոյեդովի անվան № 41 միջնակարգ դպրոցը և ընդունվել Երևանի գեղարվեստա-թատերական ինստիտուտ:

1958-ին Հ. Հովհաննիսյանը գերազանցությամբ ավարտել է Երևանի գեղարվեստա-թատերական ինստիտուտի դերասանական ֆակուլտետը (Արմեն Գուլակյանի դասարանը)՝ «Դրամատիկական թատրոնի դերասան» մասնագիտությամբ և աշխատանքի անցել ՀՍՍՀ Մինիստրների Խորհրդին առընթեր ռադիոյի և հեռուստատեսության պետական կոմիտեում որպես ռադիո-

---

<sup>1</sup> Հ. Հովհաննիսյանի մասին տե՛ս Հայ արվեստաբանների կենսամատենագիտություն № 3, Հենրիկ Հովհաննիսյան. Կենսամատենագիտություն, ներածականը և մատենագիտությունը՝ արվեստագիտության թեկնածու Արա Խզմալյանի, Երևան, 2006, 48 էջ: **Խզմալյան Ա.**, Թատրոնի պատմաբանն ու գեղագետը (ՀՀ ԳԱԱ թղթակից անդամ Հենրիկ Հովհաննիսյանի ծննդյան 80-ամյակի առթիվ), Պատմաբանասիրական հանդես, 2016, № 2, էջ 274–280: **Նավոյան Մ.**, Մեծավաստակ գիտնականը, Լրաբեր հասարակական գիտությունների, 2013, № 3, էջ 300–306:

### **Հայ թատերագիտության պատրիարքը**

հաղորդավար՝ աշխատելով մինչև 1961 թվականը, ապա՝ 1963–1968 թթ.:

1961-ին Հ. Հովհաննիսյանն ընդունվել է ՀՍՍՀ ԳԱ արվեստի ինստիտուտի ասպիրանտուրա, որն ավարտել է 1964-ին:

1965-ին ՀՍՍՀ ԳԱ գրականության և Լեզվի ինստիտուտների միացյալ գիտական խորհրդում Հ. Հովհաննիսյանը պաշտպանել է թեկնածուական դիսերտացիա «Մարտիրոս Մնակյան. կյանքը և բեմական գործունեությունը» թեմայով և ստացել արվեստագիտության թեկնածուի գիտական աստիճան (գիտական ղեկավար՝ Գառնիկ Ստեփանյան): Նույն թվականին Հ. Հովհաննիսյանն աշխատանքի է անցել ՀՍՍՀ ԳԱ արվեստի ինստիտուտում որպես կրտսեր գիտաշխատող, 1972-ին ատեստավորվել որպես ավագ գիտական աշխատող և ՍՍՀՄ Բարձրագույն որակավորման հանձնաժողովից ստացել Վկայագիր, 1987-ին որակավորվել որպես առաջատար գիտաշխատող, իսկ 1991-ին՝ գլխավոր գիտաշխատող՝ այդ պաշտոնում վերաորակավորվելով 2005-ին, 2010-ին, 2015-ին, 2016-ին և 2021-ին:

1976-ին Հ. Հովհաննիսյանը նշանակվել է Արվեստի ինստիտուտի գիտական աստիճանաշնորհման խորհրդի գիտքարտուղար:

1979-ին ՀՍՍՀ ԳԱ արվեստի ինստիտուտի գիտական աստիճանաշնորհման մասնագիտական խորհրդում նա պաշտպանել է դոկտորական դիսերտացիա՝ «Թատրոնը միջնադարյան Հայաստանում» թեմայով և ստացել արվեստագիտության դոկտորի գիտական աստիճան: 1980-ից Հ. Հովհաննիսյանը Արվեստի ինստիտուտի գիտական խորհրդի անդամ է: 1995-ից նա ՀՀ ԳԱԱ արվեստի ինստիտուտում ստեղծված՝ արվեստագիտության բնագավառում գիտական աստիճանաշնորհման միակ՝ 016 մասնագիտական խորհրդի նախագահն է: 2003-ին նրան շնորհվել է «Արվեստագիտություն» մասնագիտությամբ պրոֆեսորի գիտական կոչում: 2004-ից նա ՀՀ ԳԱԱ արվեստի ինստիտուտի թատրոնի բաժնի վարիչն է: 2006-ին ընտրվել է ՀՀ ԳԱԱ թղթակից անդամ:

Ծանրակշիռ է վաստակաշատ գիտնականի ներդրումը թատերագիտության երեք՝ պատմության, տեսության և թատերական քննադատության ասպարեզներում:

**Հայ թատրոնի պատմության** բնագավառում՝ իր աշխատություններով նա գիտական ամուր հիմքերի վրա դրեց հին և միջնադարյան թատրոնի ուսումնասիրման գործը:

Այսպես՝ քննության առնելով հայ հնագույն դրամայի ծագման հարցը, թատրոնի պատմաբանը բացահայտեց նրա նշանակությունն ընդհանուր

## Ասատրյան Ա.

թատրոնի պատմության տեսակետից: Հենվելով հայ մատենագրության և բանահյուսության տվյալների վրա՝ Հ. Հովհաննիսյանը զարգացրել է արևապատական տեսությունը՝ կապված շրթայվածի առասպելի և տարեկապի խորհրդապաշտական արարողության՝ Նավասարդի հետ: Գիտնականը սա համարում է թատրոնի հին շրջանի ուսումնասիրության մեջ իր ամենալուրջ նվաճումը, և եթե դրամայի վաղ պատմության մեջ հայտնի է «սիդերական միստերիա» հասկացությունը, ապա հայագետի համոզմամբ՝ հայ առասպելաբանության մեջ այդ միստերիայի գլխավոր պերսոնաժը Շիդարն է: Շիդարը զուգահեռվում է հայ հին վիպասքի Արտավազդի և «Սասնա ծռերի» Մհերի հետ<sup>2</sup>:

Ըստ Գրիգոր Խլաթեցու կազմած «Յայսմաւորքի» (XV դար) վերապատմելով Շիդարի առասպելը, մատնացույց անելով առասպելի միջազգային տարածում ունենալու հանգամանքը և, հետևաբար, դժվար լուծելի տեսնելով, թե Շիդարի մասին առասպելը ո՞ր տարածքում է ստեղծվել՝ Միջագետքում, Իրանում, Բալկաններում, Կովկասում, Հայկական լեռնաշխարհում, թե՛ այլուր, թատերագետն այս ունիվերսալ մոդուս ունեցող առասպելում տեսնում է մարդ արարածի գիտակցության մեջ եղած ներհայեցողական և արտահայեցողական մտածողության հնագույն միասնականության դրսևորումը: Ըստ Խորենացու պատմած գողթան երգերի ու համապատասխան առասպելական հատվածների վերականգնելով «Արտաշես և Արտավազդ» հատվածի ֆաբուլան, գիտնականը ներկայացնում է վերջինիս էզոթերիկ շերտի իմաստը և միաժամանակ մեկնում է հավաքական առումով Շիդար կոչվող խորհրդանշիչը, որն «ի վերջո հնարավոր չէ հանգեցնել ոչ չարի, ոչ բարու գաղափարին: Այս հետազոտությունից պարզ է դառնում, որ Նավասարդի տոնակատարությունը հայ իրականության մեջ անմիջական կապ ունի հայ հին դրամայի հետ»<sup>3</sup>:

Ինչպես նկատել է ՀՀ ԳԱԱ թղթակից անդամ Աելիտա Դոլուխանյանը «Հնագույն դրաման Հայաստանում» աշխատության (2010) մասին իր գրախոսականում, «Հ. Հովհաննիսյանը գրել է հայկական հնագույն դրամայի ծագման վերաբերյալ քննական հետազոտություն, որում ստուգվում են փաստերը, բաղդատվում գրավոր, բանավոր, ազգագրական տվյալները, հայ և օտարազգի մասնագետների կարծիքները: ... Թատերագետը հին դրամայի՝ աշ-

<sup>2</sup> Տե՛ս Դոլուխանյան Ա., Հերիկ Հովհաննիսյան, Հնագույն դրաման Հայաստանում, գրախոսություն, Լրաբեր հասարակական գիտությունների, 2011, № 3, էջ 287:

<sup>3</sup> Նույն տեղում:

### Հայ թատերագիտության պատրիարքը

խարհի վաղնջական դրամայի մեջ տեսնում է արևելյան հին գրականության մեջ սկեռամիտ դարձած մարդկային ոգու ազատագրման գաղափարը, որն առկա է և՛ Գրիգոր Նարեկացու «Մատենանոցի ողբերգության» երկում, և՛ Շեքսպիրի «Համլետում»։ Վերջին երկուսն էլ ուղիղ գծով կապվում են Հին Կտակարանի ամենափիլիսոփայական ու միշտ արդիական հատվածի՝ «Ժողովուրդի» հետ»<sup>4</sup>։

Հետագոտելով հայ միջնադարյան թատրոն երևույթը, Հ. Հովհաննիսյանը «Պատարագի» օրինակով պարզել է հայ եկեղեցական արարողության դրամատիկական բնույթը և ապացուցել, որ Բարսեղ Կեսարացու «Պատարագն» անտիկ ողբերգության մետամորֆոզն է՝ փոխակերպումը։

«Թատրոնը միջնադարյան Հայաստանում. պատմության և տեսության հարցեր» աշխատության մեջ (1978), ի տարբերություն իր նախորդների, ովքեր «միջնադարյան հայ թատրոնը դուրս են բերել հունական տրագեդիայից ու կոմեդիայից, գրախոսվող աշխատության հեղինակը պարզորոշ ցույց է տալիս, որ այդ թատրոնն ունի շատ ավելի խոր և բուն ազգային արմատներ, որոնք սերում են ժողովրդական բանավեպի ակունքներից»<sup>5</sup>։ Հեղինակը «լեզվական, բանահյուսական, գրական փաստերի քննության ճանապարհով բացահայտում է հայ միջնադարյան թատրոնի ուսումնասիրության պատմագեղագիտական հիմքերը, բանահյուսական ու կրոնաաշխարհայացքային ակունքները, վերականգնում նրա մոտավոր պատկերը, որոշում այդ թատրոնի գեղարվեստական առանձնահատկությունները, նրա տեղը միջնադարյան աշխարհայեցողության համակարգում։ Հայկական վաղ և դասական միջնադարի թատրոնը դիտվում է թատրոնի համընդհանուր պատմության լայն շրջանակում»<sup>6</sup>։

Հ. Հովհաննիսյանը ճշտել է թատրոն և եկեղեցի հարաբերության հարցը, բացատրելով հայ եկեղեցու թատրոնամերժ դիրքը միջնադարում։ Ըստ վաստակաշատ հայագետի, դա կապված է անտիկ թատրոնի վերասերման հետ, և մերժումն սկսվել է նախաքրիստոնեական շրջանից։ Այստեղ նաև բարոյագաղափարական լուրջ հիմքեր կան։

Իսկ «Միջնադարյան բեմ. Թատրոն-եկեղեցի հարաբերությունը և հայ հոգևոր դրաման» աշխատությունում (2004) Հ. Հովհաննիսյանը ցույց է տվել լի-

<sup>4</sup> Նույն տեղում, էջ 288։

<sup>5</sup> **Ղանալանյան Ա.**, Հ.Վ. Հովհաննիսյան, 1980, Թատրոնը միջնադարյան Հայաստանում, գրախոսություն, Պատմաբանասիրական հանդես, № 1, էջ 265։

<sup>6</sup> Նույն տեղում։

## Ասատրյան Ա.

թուրգիական դրամայի ենթադրելի դրսևորումները՝ սկսած XII դարից (Ներսես Լամբրոնացի՝ «Համբարձման ներբողեան»), ապա Ծննդյան և Չատկական ցիկլերի դրամատիզմը:

Հայ թատրոնի պատմաբանն առաջին անգամ շարադրել է XIX դարի հայ թատրոնի պատմությունը, որտեղ, հենվելով Բաբկեն Հարությունյանի «XIX–XX դարերի հայ թատրոնի տարեգրություն» եռահատորի և Գառնիկ Ստեփանյանի «Ուրվագիծ արևմտահայ թատրոնի պատմության» եռահատորի վրա, առաջին անգամ ուսումնասիրել է XIX դարի արևելահայ թատրոնի պատմությունը ևս՝ արևելահայ ու արևմտահայ թատրոնները դիտելով որպես միասնության ձգտող զուգահեռ երևույթներ: Ակադեմիկոս Լևոն Հախվերդյանի դիպուկ գնահատմամբ՝ «Կարդում ենք արևմտահայ թատրոնի մասին և տեսնում ենք, որ նրա կողքին ներկա է արևելահայը, կարդում ենք արևելահայի մասին՝ զգում ենք արևմտահայի ներկայությունը»:

Իր ուսումնասիրության առանցքում, որի կենտրոնական դեմքն ու գլխավոր հերոսը Պետրոս Ադամյանն է, Հ. Հովհաննիսյանը դրել է դերասանական անհատներին (XIX դարի թատրոնը, Հ. Հովհաննիսյանի գնահատմամբ՝ դերասանական անհատների թատրոն է) և դիտել հայ թատրոնը ռուսական և եվրոպական թատրոնների պատմության համատեքստում: Նշենք, որ Հ. Հովհաննիսյանն է հեղինակել «Հայոց պատմություն» ակադեմիական քառահատորի՝ հայ թատրոնի պատմությանը վերաբերող բոլոր հոդվածները:

**Թատրոնի տեսության ասպարեզում** երիտասարդ հետազոտողի կարևոր ներդրումը դարձավ մեզանում բեմական խոսքի պոետիկայի համակարգման առաջին փորձը հանդիսացող «Բեմական խոսքի պոետիկան» մենագրությունը (1973), որտեղ արձարծվում են բեմական խոսքին ու դերասանի արվեստին վերաբերող տեսական-գեղագիտական հրատապ խնդիրները: Աշխատության մեջ հեղինակը սկզբունքային տարբերություն է դնում տեքստի և այդ տեքստի կենդանի վերարտադրության միջև՝ դրանք դիտարկելով որպես տարբեր գեղարվեստական համակարգեր: Թատրոնի տեսաբանի կարծիքով՝ դերասանի խոսքը, ունենալով գրական հող, ինքն այլևս գրականություն չէ, այլ կենդանի դրություն: Աշխատության մասին ակադեմիկոս Ռուբեն Զարյանը «Գրական թերթում» արձանագրեց, որ սրանով «մեզանում սկիզբ է դրվում բեմական խոսքի գիտությանը»<sup>7</sup>:

<sup>7</sup> **Զարյան Ռ.** 1974, Բեմական խոսքի արվեստը, «Գրական թերթ», 1 փետրվարի:

### **Հայ թատերագիտության պատրիարքը**

«Դերասանի արվեստի բնույթը» աշխատությանը (2002), որը մյուս հանգրվանն էր, հաջորդեց Կ. Ստանիսլավսկու սիստեմի քննական դիտումը (2012), որտեղ հեղինակը սահման է դրել կիրառական հոգեբանության և խաղի գեղագիտության միջև:

Շարունակելով իր տեսական պրպտումները, «Սուրեն Քոչարյանի գրական բեմը» էսսեում (2016) Հ. Հովհաննիսյանը քննության է առել գրական բեմի նշանավոր դերասան Սուրեն Քոչարյանի արվեստը՝ դերասանին ներկայացնելով գրականագետ արտիստի առանձնահատուկ նկարագրով, որպես «մի դերասանի թատրոնը» կատարելության հասցնող արվեստագետի: Մենագրության մեջ հեղինակը նորովի է քննել բեմական արվեստի և գրական նյութի հարաբերությունը՝ այն, ինչը տարբեր հայեցակետերով դիտվել է հեղինակի նախորդ երկու՝ «Դերասանի արվեստի բնույթը» և «Ստանիսլավսկու սիստեմը և խաղի պարադոքսը» աշխատություններում: Զարգացնելով նախորդ հարցադրումները, Հ. Հովհաննիսյանը բացահայտել է օտարման ու վերապրումի՝ դրությունը կրողի և ներկայացնողի հարաբերությունը գրական բեմում, որտեղ բացառվում է այսպես կոչված հրապարակային մենակությունը: Խնդիրը դիտված է գրական էստրադայի վարպետ Սուրեն Քոչարյանի արվեստի հիման վրա: Տեսական թատերագիտության այս հարցը ուսումնասիրված չէր և այս աշխատության մեջ քննվեց առաջին անգամ՝ լրացնելով Հ. Հովհաննիսյանի նախորդ տեսական զննումներն ու եզրակացությունները:

Այսօր էլ բազմալաստակ գիտնականը զբաղված է դրամայի տեսության խնդիրներով և նրա նպատակն է դրամայի տեսությունը առանձնացնել գրականության տեսությունից, դիտել թատերագիտական տեսակետով, այսինքն՝ նախասկիզբը համարել խաղը: Անդրադառնալով հայ ժողովրդական խաղերին և այդ հիմքի վրա մշակելով հարցը՝ գիտնականն իր առջև նպատակ է դրել գրելու դրամայի թատերագիտական տեսությունը, գրականության տեսությունից տարբեր, պարզելու դրամայի գոյահիմքը՝ սուբստանցը՝ բոլոր անցնողական (ռեյատիվ) խնդիրներից դուրս: Այդ ուղղությամբ առաջին հաջող քայլն արված է. խոսքը «Դրամայի բնագանգական զուգահեռը» վերնագրով հոդվածի մասին է, որտեղ համեմատական է ընտրված շախմատային խաղը:

**Թատերական քննադատության** ասպարեզում Հ. Հովհաննիսյանը հիստուն տարվա ընթացքում հանդես է եկել 48 հրապարակումներով, որոնցից յուրաքանչյուրում ներկայացրել է տվյալ ներկայացման հետ կապված որևէ՝ հաստատական կամ մերժողական, դրույթ: Եվ ինչպես խոստովանում է գիտ-

նականը՝ քննադատությունն իր համար եղել է ոչ հիմնական զբաղմունք. «Հիմնականը եղել ու մնում է գիտական ուսումնասիրությունը»:

Գիտահետազոտական բեղմնավոր աշխատանքին զուգահեռ, տարիներ շարունակ Հ. Հովհաննիսյանը զբաղվել է թարգմանական ու բանաստեղծական գործունեությամբ, որի արդյունքները հրատարակվել են առանձին ժողովածուներով՝ «Ալեքսանդր Պուշկին. (թարգմանություններ և առաջաբան)» (Երևան, 1999) և «Անդարծություն» (2014), որտեղ տեղ են գտել թարգմանություններ. Տյուտչև, Նադսոն, Բալմոնտ, Սևերյանին: «Սկեպսիս» խորագրով (2019) ժողովածուն ամփոփում է գիտնականի քառյակները:

Իսկ վերջերս Հ. Հովհաննիսյանը հեղինակել է տեքստ՝ գրված Հայաստանի Հանրապետության օրհներգի համար, Արամ Խաչատրյանի երաժշտությանը համապատասխանեցված, որն առաջին անգամ հրապարակվեց «Արվեստագիտական հանդեսի» 2021թ. 1-ին համարում՝ գիտնականի հետ ծավալուն հարցազրույցի ընթացքում<sup>8</sup> և լավագույնս բավարարում է պետական օրհներգերին ներկայացվող պահանջները՝ լավատեսական ու կենսահաստատ բովանդակություն և ոչ թե մահվան գաղափարի անվերջ ընդգծում:

Հ. Հովհաննիսյանի գիտական ու գիտակազմակերպական բեղմնավոր աշխատանքը հաջողությամբ զուգակցվում է **մանկավարժական** բազմարդյուն գործունեության հետ: Նա 1968-ից ընդհատումներով, հիսուն տարի դասավանդում է Երևանի գեղարվեստաթատերական ինստիտուտում՝ վարելով «Հայ թատրոնի պատմություն», «Բեմական խոսքի արվեստ», «Արևմտաեվրոպական թատրոնի պատմություն», «Դրամայի տեսություն», «Մասնագիտության ներածություն», «Թատերական քննադատություն», «Արվեստի փիլիսոփայություն» դասընթացները, ղեկավարելով ասպիրանտների և մագիստրանտների գիտական աշխատանքները և կազմելով հայ թատրոնի պատմության ծրագիրը (2015), ինչպես նաև Երևանի պետական համալսարանում (1976–1979) և Ի. Աբովյանի անվան հայկական պետական մանկավարժական ինստիտուտում (1986–1991): Եվ պատահական չէ, որ իր՝ առայժմ, վերջին աշխատությունը՝ «Դերասանի ինքնաճանաչումը», որտեղ քննության է առել դերասանի արվեստի բնույթն իր ուսումնառության շրջանի և հետագայի կենդանի օրինակների ու գրույցների հիման վրա՝ նկատի առնելով Վարդան Աճեմյանի ու Արմեն Գուլակյանի ստեղծագործական սկզբունքներն ու աշխատանքի եղանակները՝ հիմնված Կ.Ստանիսլավսկու ուսմունքի ստեղծագործա-

<sup>8</sup> 60 տարի ՀՀ ԳԱԱ Արվեստի ինստիտուտում. Հենրիկ Հովհաննիսյան, «Արվեստագիտական հանդես», 2021, № 1, էջ 239:

### **Հայ թատերագիտության պատրիարքը**

կան կիրառման վրա, նվիրել է Երևանի թատրոնի և կինոյի պետական ինստիտուտին:

Ծանրակշիռ է Հ. Հովհաննիսյանի ներդրումը երիտասարդ կադրերի պատրաստման գործում: Նրա գիտական ղեկավարությամբ պաշտպանվել է թեկնածուական տասնհինգ ատենախոսություն: Տարիներ շարունակ նա «Թատերական արվեստ, կինոարվեստ, հեռուստատեսություն» մասնագիտությամբ թեկնածուական որակավորման քննական հանձնաժողովի նախագահն է:

Հ. Հովհաննիսյանի գիտաստեղծագործական դիմանկարն ուրվագծելիս անհրաժեշտ է անդրադառնալ նրա գիտալուսավորչական գործունեությանը ևս, որը սերտորեն կապված է հեռուստատեսության հետ: Հ. Հովհաննիսյանը 1990–1991 թթ. եղել է ՀՀ հեռուստատեսության և ռադիոյի պետական կոմիտեի նախագահը, իսկ 2001-ին ՀՀ նախագահի հրամանով նշանակվել Հանրային հեռուստառադիոընկերության խորհրդի անդամ: Հեռուստատեսությամբ մոտ երեսուն տարի շարունակ նա վարել է տարբեր հաղորդաշարեր՝ «Մեր լեզուն մեր հայրենիքն է», «Հոգևոր հայրենիք», «Արվեստն արվեստի համար», «Արվեստը և իրականությունը»: Վերջին շրջանում նա հեռուստադիտողին է ներկայանում «Արվեստագիտության լսարան» հաղորդաշարով:

Հ. Հովհաննիսյանի գիտական ու գիտամանկավարժական արդյունաշատ աշխատանքը հաջողությամբ զուգակցվում է հասարակական ակտիվ գործունեության հետ: 2009–2018 թթ. Հ. Հովհաննիսյանը եղել է ՀՀ նորաստեղծ Հանրային խորհրդի անդամ: Նա եղել է Հայկական Սովետական Հանրագիտարանի գիտաճյուղային խորհրդի անդամ (1973-ից), Հայկական համառոտ հանրագիտարանի գիտական խորհրդատու՝ թատրոնի գծով (1990-ից), Երևանի Ե. Չարենցի անվան գրականության և արվեստի թանգարանի գիտական խորհրդի անդամ (1992-ից), Երևանի թատրոնի և կինոյի պետական ինստիտուտի գիտական խորհրդի և կառավարման խորհրդի անդամ, ՀՀ ԳԱԱ «Պատմաքանասիրական հանդեսի» և ՀՀ ԳԱԱ արվեստի ինստիտուտի «Արվեստագիտական հանդեսի» խմբագրական խորհուրդների անդամ:

Գիտական և գիտամանկավարժական ծանրակշիռ վաստակի համար Հ. Հովհաննիսյանն արժանացել է ՀՀ գիտության վաստակավոր գործչի պատվավոր կոչման (2003), պարգևատրվել ՀՍՍՀ ԳԱ Գովեստագրով (1979), ՀՀ մշակույթի նախարարության «Ոսկե մեդալով» (2008), «Հայրենիքին մատուցած ծառայությունների համար» առաջին աստիճանի մեդալով (2011) և Մայր Աթոռ Ս.Էջմիածնի «Ս.Սահակ – Ս.Մեսրոպ» շքանշանով (2016): Ծննդյան հո-

### **Ասատրյան Ա.**

---

բեյլանի կապակցությամբ Հ. Հովհաննիսյանն օրերս պարզևատրվեց Սուրբ Մեսրոպ Մաշտոցի շքանշանով:

Այսօր էլ հայ թատերագիտության պատրիարք Հենրիկ Հովհաննիսյանը շարունակում է իր գիտաստեղծագործական, գիտամանկավարժական, գիտալուսավորչական ու հասարակական բեղմնավոր գործունեությունը՝ հանուն հայ արվեստագիտության և հայագիտության առաջընթացի:

### **ԱՆՆԱ ԱՍԱՏՐՅԱՆ**

*ՀՀ ԳԱԱ արվեստի ինստիտուտի տնօրենի ժամանակավոր  
պաշտոնակատար, արվեստագիտության դոկտոր, պրոֆեսոր,*

*ՀՀ արվեստի վաստակավոր գործիչ  
annaasatryan2013@gmail.com*